

**Usul (41):** Mana-mana riwayat yang menyatakan pada abad sekian-sekian, pada tahun sekian-sekian, pada bulan sekian-sekian atau pada hari sekian-sekian akan berlaku peristiwa-peristiwa tertentu dengan tepat dan jelas semuanya *maudhu`*. Demikian juga riwayat-riwayat yang menyatakan dengan jelas dan tepat pada tahun sekian-sekian hendaklah dibuat begini-begini sebagai panduan bagi orang-orang yang berada padanya. Tidak ada satu pun daripadanya *sahih*.

Antara contohnya ialah beberapa riwayat di bawah ini:

(١) لَا يُوَلَّدُ بَعْدَ الْمِائَةِ مَوْلُودٌ لِلَّهِ فِيهِ حَاجَةٌ

Maksudnya: Allah tidak memerlukan anak-anak yang dilahirkan selepas seratus tahun (abad pertama).

(٢) عَنْ فَيْرُوزِ الدَّيْلَمِيِّ قَالَ قَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ: يَكُونُ صَوْتُ فِي رَمَضَانَ قَالُوا: يَا رَسُولَ اللَّهِ فِي أَوَّلِهِ أَوْ فِي وَسْطِهِ أَوْ فِي آخِرِهِ؟ قَالَ: بَلْ فِي النِّصْفِ مِنْ رَمَضَانَ إِذَا كَانَ لَيْلَةُ النِّصْفِ مِنْ رَمَضَانَ لَيْلَةُ الْجُمُعَةِ، يَكُونُ صَوْتُ مِنَ السَّمَاءِ يَصْعَقُ لَهُ سَبْعُونَ أَلْفًا، وَيَخْرُسُ سَبْعُونَ أَلْفًا، وَيَعْمَى سَبْعُونَ أَلْفًا، وَيَصْمُ سَبْعُونَ أَلْفًا قَالُوا يَا رَسُولَ اللَّهِ، فَمَنْ السَّالِمُ مِنْ أَمْتِكَ؟ قَالَ: مَنْ لَزِمَ بَيْتَهُ وَتَعَوَّذَ بِالسُّجُودِ وَجَهَرَ بِالتَّكْبِيرِ لِلَّهِ تَعَالَى ....

Maksudnya: Fairuz ad-Dailami berkata, Rasulullah s.a.w. bersabda: “Nanti akan ada satu suara di bulan Ramadhan. Mereka (para sahabat) bertanya: “Di awalnyaakah atau di tengahnya atau di akhirnya?” Jawab Nabi s.a.w.: “Bahkan di tengah bulan Ramadhan, apabila tengah bulan Ramadhan itu kena pada malam Juma`at. Satu suara datang dari langit, kerananya akan pengsan tujuh puluh ribu manusia. Akan jadi bisu tujuh puluh ribu orang. Akan jadi buta tujuh puluh ribu orang dan akan jadi pekak tujuh puluh ribu orang. Mereka (para sahabat) bertanya, “Siapakah dari kalangan umatmu yang selamat?” Jawab Baginda: “Orang yang tetap di rumahnya, melindungi dirinya dengan bersujud dan bertakbir dengan suara yang kuat....

(٣) عَنْ حَذِيفَةَ قَالَ قَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ: إِذَا كَانَتْ سَنَةٌ خَمْسِينَ وَمِائَةً فَخَيْرُ أَوْلَادِكُمُ الْبَنَاتُ. فَإِذَا كَانَتْ سَنَةٌ سِتِينَ وَمِائَةً فَأَمَثَلُ النَّاسِ يَوْمُنَا كُلِّ ذِي حَازَلْنَا: وَمَا الْحَازُ؟ قَالَ: الَّذِي لَيْسَ لَهُ وَلَدٌ خَفِيفُ الْمَوْنَةِ

Maksudnya: diriwayatkan daripada Huzaifah, katanya: Rasulullah s.a.w. bersabda: Apabila tiba tahun 150, maka sebaik-baik anak-anakmu ialah anak-anak perempuan. Apabila tiba tahun 160 (pula), maka manusia yang terbaik pada masa itu ialah yang tiada tanggungan.” Kami bertanya: “Apakah maksud manusia yang tiada tanggungan

itu?” Jawab Nabi s.a.w.: “Iaitu orang yang tidak mempunyai anak, tidak banyak pula perbelanjaan / hartanya.”

(٤) عن ابن مسعود أن رسول الله صلى الله عليه وسلم قال: إِذَا أَتَيْتَ عَلَى أُمَّتِي ثَلَاثِمِائَةٍ وَثَمَانُونَ سَنَةً فَقَدْ حَلَّتْ لَهُمُ الْعُرْبَةُ وَالتَّرَهُبُ عَلَى رُؤُوسِ الْجِبَالِ

Maksudnya: Diriwayatkan daripada Ibnu Mas`ud, bahawa Rasulullah s.a.w. bersabda: “Apabila tiba tahun 380 (Hijrah) kepada umatku, halallah kepada mereka hidup membujang dan bertapa di atas puncak gunung-gunung.”

### **Rujukan:**

Hadits contoh (1) dikemukakan oleh at-Thabarāni di dalam al-Mu`jamu al-Kabir j.8 m/s 27, as-Suyuthi di dalam Jam`u al-Jawāmi` (al-Jami` al-Kabir) j.12 m/s 212, Ibnu al-Jauzi di dalam al-Maudhū`āt j.3 m/s 192, as-Suyuthi di dalam al-La`āli`u al-Mashnu`ah j.2 m/s 324, Ibnu `Arrāq al-Kināni – Tanzih as-Syari`ah al-Marfū`ah j.2 m/s 345, as-Syaukāni- al-Fawā`idu al-Majmu`ah m/s 510, Muḥammad Thahir al-Fattani al-Hindi- Tazkiratu al-Maudhū`āt m/s 222.

Hadits contoh (2) dikemukakan oleh Ibnu al-Jauzi di dalam al-Maudhū`āt j.3 m/s 191-192, Abul Maḥāsin al-Qāwuqji at-Tharābulsi di dalam al-Lu`lu`ul Marshū` m/s 233, Ibnu al-Qayyim di dalam al-Manāru al-Munīf m/s 110, Mulla `Ali al-Qāri di dalam Al-Asrār al-Marfū`ah m/s 472.

Hadits contoh (3) dikemukakan oleh Ibnu al-Jauzi di dalam al-Maudhū`āt j.3 m/s 194, As-Suyūthi di dalam al-La`āli`u al-Mashnū`ah j.2 m/s 326, Ibnu `Arrāq al-Kināni di dalam Tanzīhu asy-Syarī`ah al-Marfū`ah. Al-Būshīri juga turut menukilkannya daripada Ibnu al-Jauzi di dalam Ithāf al-Khiyarat al-Maharah j.4 m/s 13.

Hadits contoh (4) dikemukakan oleh Ibnu al-Jauzi di dalam al-Maudhū`āt j.3 m/s 198, Ibnu `Arrāq al-Kināni di dalam Tanzīhu asy-Syarī`ah al-Marfū`ah j.2 m/s 346, Ibnu al-Qayyim di dalam al-Manāru al-Munīf m/s 111, az-Zaila`i di dalam Takhrīj Ahādīts al-Kasysyāf j.2 m/s 441, dan Mulla `Ali al-Qāri di dalam Al-Asrār al-Marfū`ah m/s 473.

### **Komentar:**

(1) Sanad at-Thabarāni bagi hadits contoh (1) adalah seperti berikut:

حَدَّثَنَا أَحْمَدُ بْنُ الْقَاسِمِ بْنِ مُسَاوِرٍ الْجَوْهَرِيُّ، وَمُحَمَّدُ بْنُ جَعْفَرِ بْنِ أَغَيْنٍ، قَالَا: ثنا خَالِدُ بْنُ خَدَّاشٍ، ثنا حَمَّادُ بْنُ زَيْدٍ، عَنْ أَيُّوبَ، عَنْ الْحَسَنِ، عَنْ صَخْرِ بْنِ قُدَّامَةَ قَالَ: قَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ

(2) Al-Haitsami di dalam Majma' az-Zawā'id (j.8 m/s 159) setelah mengemukakan riwayat at-Thabarāni itu berkata: "At-Thabarāni meriwayatkannya daripada (dua orang) Syeikhnya Aḥmad bin al-Qasim bin Musawir dan Muḥammad bin Ja'far bin A'yan. Aku tidak mengenali mereka berdua. Sementara perawi-perawi yang lain adalah perawi-perawi hadits sahih.

(3) Ibnu al-Atsir al-Jazari di dalam Usdu al-Ghabah (j.3 m/s 14) di bawah biografi Shakhr bin Qudāmah menulis: "Shakhr bin Qudāmah al-'Uqaili. Ḥammād bin Zaid meriwayatkan daripada Ayyub daripada al-Ḥasan al-Bashri daripada Shakhr bin Qudāmah, katanya: Rasulullah s.a.w. bersabda: لَا يُولَدُ بَعْدَ مِائَةِ سَنَةٍ مَوْلُودٌ لَلَّهِ فِيهِ حَاجَةٌ. Maksudnya: Allah tidak memerlukan anak-anak yang dilahirkan selepas seratus tahun (abad pertama). Kata Ayyub, setelah itu aku bertemu Shakhr bin Qudāmah, lalu aku bertanya dia tentang hadits itu. Dia tidak mengetahuinya."

(4) Di bawah biografi Shakhr bin Qudāmah juga Ḥāfiẓh Ibnu Ḥajar menulis: "At-Thabarāni dan Ibnu Syāhīn meriwayatkan melalui saluran riwayat Ḥammād bin Zaid daripada Ayyub daripada al-Ḥasan daripada Shakhr bin Qudāmah al-'Uqaili, katanya: Rasulullah s.a.w. bersabda seperti tersebut tadi. Kemudian beliau berkata: "Kata Ibnu Syāhīn, ini adalah *hadits munkar*. Al-Baghdadi ini (maksudnya Muḥammad bin Ja'far bin A'yan) aku tidak mengenalinya." Aku (Ḥāfiẓh Ibnu Ḥajar) berkata, "Ia adalah perawi tsiqah lagi masyhur. Ia pula tidak bersendirian dalam meriwayatkannya. Tetapi (Zakariya) as-Sāji menukikan daripada 'Ali bin al-Madīni bahawa beliau mendha'ifkan Khalid bin Khidāsy, perawinya daripada Ḥammād bin Zaid. As-Sāji juga menukikan daripada Yahya bin Ma'īn bahawa Khalid bersendirian dalam meriwayatkan beberapa hadits." Ibnu al-Jauzi telah memasukkan hadits ini ke dalam senarai hadits-hadits *maudhu'* di dalam kitabnya al-Maudhū'āt. Beliau menukikan daripada Aḥmad bahawa beliau berkata, "Hadits itu tidak sahih." Ibnu Mandah pula berkata, "Tidak sepakat para 'ulama' tentang Shakhr bin Qudāmah itu sahabat Rasulullah s.a.w." Menurut Ḥāfiẓh Ibnu Ḥajar, dia (Shakhr bin Qudāmah) tidak menyebut dengan jelas telah mendengarnya daripada Nabi s.a.w. Ḥasan juga tidak

menyebutkan dengan jelas telah mendengar daripadanya (secara langsung). Itu juga merupakan *`illat* bagi hadits ini. (Lihat al-Ishābah j.3 m/s 417).

Di dalam Taqrīb at-Taḥdzīb Ḥāfiẓh Ibnu Ḥajar menulis, Khalid bin Khidāsy al-Muhallabi meninggal dunia pada tahun 224 Hijrah, dan dia adalah perawi shadūq yang banyak melakukan kesilapan dalam periwayatan. (Lihat Taqrīb at-Taḥdzīb j.1 m/s 212).

(5) Az-Zahabi di dalam Mīzān al-I'tidāl berkata, “Shakhr bin Qudāmah Tābi`i (bukan sahabat), dan hadits ini *munkar*. (Lihat Mīzān al-I'tidāl j.1 m/s 629).

(6) Ibnu al-Jauzi setelah mengemukakan hadits itu di dalam kitabnya al-Maudhū`āt di bawah “Kitab Al-Malāḥim Dan Al-Fitan, Bab Celaan Terhadap Orang-Orang Yang Dilahirkan Setelah Seratus Tahun (Abad Pertama)” menulis, “Jika dikatakan isnadnya sah?”, maka jawabannya ialah riwayat yang dikemukakan secara *`an`anah* itu mempunyai kemungkinan bahawa salah seorang perawinya telah mendengarnya daripada perawi dha`if atau pendusta besar, lalu digugurkan namanya. Dan orang yang meriwayatkan hadits itu daripadanya telah menggunakan lafaz عَنْ. Maka bagaimana ia akan jadi sah? Sedangkan sekian ramai imam dan pemimpin yang hebat-hebat (pula) dilahirkan setelah abad pertama Hijrah??” (Lihat al-Maudhū`āt j.3 m/s 192).

Nah! Ibnu al-Jauzi telah menyebutkan salah satu qaedah dirayah di sini, bahawa bagaimana ia akan jadi sah, sedangkan sekian ramai imam dan pemimpin yang hebat-hebat (dalam Islam) dilahirkan setelah abad pertama Hijrah?” Apakah mereka tidak diperlukan umat? Apakah ertinya Allah tidak memerlukan anak-anak yang dilahirkan selepas seratus tahun (abad pertama) itu? Apakah manusia yang dilahirkan selepas seratus tahun (abad pertama) itu tidak berguna semuanya di sisi Allah?? Ia adalah suatu yang bertentangan dengan kenyataan!

(7) Bagaimana riwayat itu boleh benar, sedangkan ayat-ayat al-Qur`ān dan hadits-hadits yang sah menggalakkan umat ini terus-menerus berkahwin dan membiak dengan ramai hingga ke akhir zaman? Orang yang tidak suka kepada perkahwinan dikatakan oleh Rasulullah s.a.w. sebagai bukan umatnya. Lihat beberapa firman Allah dan sabda Rasulullah s.a.w. di bawah ini:

Allah berfirman di dalam al-Qur'ān:

وَاللَّهُ جَعَلَ لَكُم مِّنْ أَنْفُسِكُمْ أَزْوَاجًا وَجَعَلَ لَكُم مِّنْ أَزْوَاجِكُمْ بَنِينَ وَحَفَدَةً وَرَزَقَكُمْ مِّنَ الطَّيِّبَاتِ أَفَبِالْبَاطِلِ  
يُؤْمِنُونَ وَيَنْعَمَتِ اللَّهُ هُمْ يَكْفُرُونَ ﴿٧٢﴾

Bermaksud: Allah menjadikan untuk kamu isteri-isteri dari jenismu sendiri dan menjadikan untukmu dari isteri-isterimu itu, anak-anak dan cucu-cicit, selain mengurniakan kepadamu rezeki dari (benda) yang baik-baik. Maka mengapakah mereka percaya kepada perkara yang bathil dan kufur pula akan nikmat Allah? (an-Nahl:72).

وَالَّذِينَ ءَامَنُوا وَاتَّبَعَتْهُمْ ذُرِّيَّتُهُمْ بِإِيمَانٍ أَلْحَقْنَا بِهِمْ ذُرِّيَّتَهُمْ وَمَا أَلَتْنَاهُمْ مِّنْ عَمَلِهِمْ مِّنْ شَيْءٍ كُلُّ امْرِئٍ بِمَا كَسَبَ رَهِينٌ ﴿٧٣﴾

Bermaksud: Dan orang-orang beriman yang diturut oleh zuriat keturunannya dengan keadaan beriman, Kami hubungkan (himpunkan) zuriat keturunannya itu dengan mereka (di dalam Syurga); dan Kami (dengan itu) tidak mengurangi sedikitpun pahala amalan mereka; tiap-tiap seorang manusia terikat dengan amal yang dikerjakannya. (at-Thūr:21).

وَالَّذِينَ يَقُولُونَ رَبَّنَا هَبْ لَنَا مِنْ أَزْوَاجِنَا ذُرِّيَّتًا قُرَّةَ أَعْيُنٍ وَاجْعَلْنَا لِلْمُتَّقِينَ إِمَامًا ﴿٧٤﴾

Bermaksud: Dan juga mereka (yang diredhai Allah itu ialah orang-orang) yang berdoa dengan berkata: Wahai Tuhan kami, berilah kami beroleh dari isteri-isteri dan zuriat keturunan kami perkara-perkara yang menyukakan hati melihatnya dan jadikanlah kami imam (ikutan) bagi orang-orang yang bertaqwa. (al-Furqaan:74).

Rasulullah s.a.w. pula bersabda:

أَمَّا وَاللَّهِ؛ إِنِّي لَأَخْشَاكُمُ لِلَّهِ، وَأَتَقَاكُمُ لَهُ، لِكَيْتِي أَصُومُ وَأُفْطِرُ، وَأُصَلِّي وَأَرْقُدُ، وَأَتَزَوَّجُ النِّسَاءَ، فَمَنْ رَغِبَ عَنِّي؛  
فَلَيْسَ مِنِّي

Bermaksud: “Ketahuilah, Demi Allah! Sesungguhnya aku adalah orang yang paling takut kepada Allah di kalanganmu, aku adalah orang yang paling bertaqwa kepadaNya di kalanganmu. Walaupun begitu, aku berpuasa dan berbuka, aku bersembahyang dan aku juga tidur, aku mengahwini wanita-wanita. Sesiapa yang

tidak suka kepada Sunnahku (cara hidupku), bukanlah ia dari (umat)ku.” (Hadits riwayat Bukhāri, Muslim, Ibnu Khuzaimah, Ibnu Ḥibbān dan lain-lain).

Baginda s.a.w. bersabda lagi:

تَزَوَّجُوا الْوُلُودَ فَإِنِّي مُكَاثِّرُ بِكُمْ الْأُمَّمَ يَوْمَ الْقِيَامَةِ

Bermaksud: “Kahwinilah wanita yang pengasih dan peranak (mampu melahirkan ramai anak), kerana sesungguhnya aku akan berbangga di hadapan umat-umat yang lain di hari kiamat kelak dengan ramainya kamu.” (Hadits riwayat Abu Daud, an-Nasā’i, at-Thabarāni, al-Ḥākim, al-Baihaqi al-Bazzār dan lain-lain).

مَثَلُ أُمَّتِي مَثَلُ الْمَطَرِ لَا يُدْرَى أَوَّلُهُ خَيْرٌ أَمْ آخِرُهُ

Bermaksud: Perbandingan umatku adalah seperti hujan, tidak diketahui yang di permulaannyakah lebih baik atau yang di penghujungnya. (Hadits riwayat Tirmidzi, Aḥmad, Ibnu Ḥibbān, al-Bazzār, at-Thabarāni, Abu Ya’la dan lain-lain).

(8) Setelah mengemukakan hadits contoh (2) Ibnu al-Jauzi berkata, “Ini adalah hadits yang tidak sahih.”

(9) Sanad hadits contoh (2) yang dikemukakan oleh Ibnu al-Jauzi itu adalah seperti berikut:

أنبأنا محمد بن ناصر أنبأنا أبو علي الحسن بن أحمد الحداد حدثنا أبو نعيم الحافظ حدثنا سليمان بن أحمد الطبراني حدثنا أحمد ابن عبد الوهاب بن نجدة حدثنا عبد الوهاب بن الضحاك حدثنا إسماعيل بن عياش الاوزاعي عن عبدة بن أبي لبابة عن فيروز الديلمي قال قال رسول الله صلى الله عليه وسلم:

Setelah mengemukakan hadits berkenaan dengan sanad ini Ibnu al-Jauzi menukilkan kata-kata tokoh-tokoh ‘ulama’ Rijāl hadits tentang perawi-perawinya. ‘Abdul Wahhāb adalah salah seorang perawinya. Menurut al-‘Uqaili, ia adalah perawi yang langsung tiada nilainya (ليس بشيء). Menurut al-‘Utaiqi, ‘Abdul Wahhāb perawi *matrūkul hadits*.

Menurut Ibnu Ḥibbān, ia adalah perawi yang mencuri hadits, tidak halal menjadikannya sebagai hujah. Dāraquthni pula berkata, “‘Abdul Wahhāb perawi *munkarul hadits*.”

Isma'il juga perawi dha'if. 'Abdah pula tidak pernah melihat Fairūz. Demikian dengan Fairūz, ia juga tidak pernah melihat Nabi s.a.w.

(10) Menurut Ibnu al-Jauzi, hadits contoh (2) itu diriwayatkan juga oleh Ghulam Khalīl daripada Muḥammad bin Ibrahim al-Bayādhi daripada Yaḥya bin Sa'id al-'Aththār daripada Abi al-Muhājir daripada al-Auzā'i.

Kata Ibnu al-Jauzi, semua mereka *sangat dha'if*. Ghulam Khalīl sering mereka (mengada-ngadakan) hadits.

(11) Hadits contoh (3) dikemukakan oleh Ibnu al-Jauzi pada ذكر الخمسين والمائة (Bab Berkenaan Dengan Tahun Seratus Lima puluh) dengan dua sanad, iaitu:

(١) أنبأنا محمد بن عبد الملك وابن خيرون أنبأنا إسماعيل بن مسعدة أنبأنا حمزة بن يوسف أنبأنا أبو أحمد بن عدى حدثنا عبدان حدثنا ابن مصفى حدثنا يحيى بن سعيد العطار عن محمد الاسدي عن الاعمش عن شقيق عن حذيفة قال قال رسول الله صلى الله عليه وسلم

(٢) أنبأنا عبد الرحمن بن محمد القزاز أنبأنا أحمد بن علي بن ثابت أنبأنا أحمد بن محمد الدستوائى حدثنا علي بن عمر الحافظ حدثنا أبو العباس عبد الله بن أحمد المارشانى حدثنا أحمد بن إبراهيم المارشانى حدثنا محمد بن عبد الله أبو جعفر عن سيف بن محمد عن الاعمش عن أبي وائل عن حذيفة قال قال رسول الله صلى الله عليه وسلم

Setelah mengemukakan hadits berkenaan dengan dua sanad tersebut beliau berkata: “Ini adalah hadits yang langsung tiada nilainya (هذا حديث ليس بشيء). Muḥammad al-Asadi adalah Muḥammad bin Ishaq bin Ibrahim bin Muḥammad bin 'Ukāsyah.

Kata Yaḥya, “Dia pendusta besar.” Ibnu 'Adi berkata, “Dia meriwayatkan hadits-hadits mungkar dan maudhu' daripada al-Auzā'i.” ad-Dāraquthni pula berkata, “Dia mereka (mengada-ngadakan) hadits.”

Yaḥya bin Sa'id al-'Aththār adalah perawi hadits ini daripada Muḥammad al-Asadi. Keadaannya tidak lebih baik daripada Muḥammad al-Asadi. Kata Yaḥya bin Ma'īn tentangnya, “Perawi yang langsung tidak bernilai (ليس بشيء).” Ibnu Ḥibbān berkata, “Dia (Yaḥya bin Sa'id al-'Aththār) meriwayatkan hadits-hadits maudhu' daripada perawi-perawi yang kuat. Tidak harus berhujah dengannya.”

Saif bin Muḥammad yang terdapat di dalam sanad kedua pula adalah pendusta besar. Para `ulama' Rijāl hadits ijmā' tentang dia seorang pendusta. Imam Aḥmad berkata, "Dia selalu mereka (mengada-ngadakan) hadits."

(12) Hadits contoh (3) itu jika ditinjau dari sudut dirayat tidak membawa apa-apa erti selain daripada kemunduran kepada umat Islam. Kekarutannya dapat diketahui dengan adanya nas-nas yang terang daripada al-Qur'ān dan as-Sunnah seperti telah dikemukakan pada komentar nombor (7) yang lalu.

(13) Hadits contoh (4) dikemukakan oleh Ibnu al-Jauzi di bawah باب العزبة والترهب بعد الثمانين و الثمانين dengan sanad seperti di bawah ini:

أنبأنا زاهر بن طاهر أنبأنا أبو بكر أحمد بن الحسين البيهقي أنبأنا أبو عبد الله محمد بن عبد الله الحاكم أخبرني أبو عمر عبد الواحد بن أحمد بن محمد القرشي حدثنا أبي حدثنا علان بن المغيرة حدثنا عبد الله بن صالح حدثنا أبو يحيى الخراساني سليمان بن عيسى حدثنا سفيان الثوري عن منصور عن إبراهيم عن علقمة عن ابن مسعود أن رسول الله صلى الله عليه وسلم قال ...

Setelah mengemukakannya beliau berkata, "Ini adalah hadits maudhu'. Kata Ibnu `Adi, Sulaiman bin `Isa mengada-ngadakan hadits."

(14) Hadits yang sama juga terdapat di dalam Fawā'id Tammām, at-Thā'atu Wa al-Ma'shiah karangan `Ali bin Ma'bad, Fawā'id ar-Rāzi dan Talkhīsh al-Maudhū'āt, tetapi tahun yang tersebut berbeza-beza. Ada yang menyebut tahun 300, ada tahun 180 dan ada juga tahun 130. Hadits contoh (4) pula menyebut tahun 380.

Begitu sekali *idhthirāb* terdapat pada riwayat-riwayatnya. Sedangkan *idhthirāb* adalah salah satu ciri utama hadits dha'if.

(15) Bayangkanlah apa akan terjadi kepada umat Islam sekiranya mereka mengikuti hadits maudhu' itu. Bukan di zaman dahulu sahaja mereka boleh mundur kerananya, hari ini pun sama. Musuh-musuh Islam sememangnya tahu bahawa mana-mana umat pun yang memilih cara hidup membujang dan lari meninggalkan dunia ke puncak-puncak gunung untuk bertapa pasti akan mundur dan ketinggalan zaman.

(16) Apa yang telah terjadi kepada penganut-penganut agama lain, itulah yang dikehendaki terjadi juga kepada umat Islam. Kalau penganut agama Kristian menganggap paderi mereka yang hidup membujang sebagai manusia terpilih yang



hampir dengan Tuhan, begitu juga penganut agama Hindu, Budha dan lain-lain menganggap sami-sami mereka yang membujang dan selalu bertapa itu sebagai orang yang terbaik menurut agama mereka di sisi tuhan.

Umat Islam yang terpengaruh dan terpedaya dengan agama-agama seperti itu kerana bergaul dan hidup dengan mereka juga mulai cenderung kepada fahaman dan ajaran seperti itu. Padahal Nabi s.a.w. datang untuk menghapuskannya. Kerana itulah Baginda bersabda:

النَّكَاحُ مِنْ سُنَّتِي، فَمَنْ لَمْ يَعْمَلْ بِسُنَّتِي فَلَيْسَ مِنِّي

Bermaksud: Perkahwinan adalah salah satu Sunnahku. Sesiapa yang tidak beramal dengan Sunnahku dia bukan dari kalanganku. (Hadits riwayat Ibnu Majah).

Baginda juga bersabda:

أَمَّا وَاللَّهِ؛ إِنِّي لَأُحْشَاكُمُ لِلَّهِ، وَأَتَّقَاكُمْ لَهُ، لِكَيْ أَصُومَ وَأُفِطِرُ، وَأُصَلِّيَ وَأُزِفِدُ، وَأَتَزَوَّجَ النِّسَاءَ، فَمَنْ رَغِبَ عَن سُنَّتِي؛ فَلَيْسَ مِنِّي.

Bermaksud: Ketahuilah, demi Allah! Sesungguhnya aku paling takut kepada Allah di antara kamu, aku juga paling bertaqwa kepadaNya, tetapi aku berpuasa dan tidak berpuasa juga, aku bersembahyang dan tidur, aku juga berkahwin. Sesiapa yang tidak suka kepada Sunnahku, dia bukan dari kalanganku. (Hadits riwayat Bukhāri, Muslim dan Ahmad).

(17) Ibnu al-Qayyim ketika menyebutkan jenis-jenis hadits yang diada-adakan secara dusta atas nama Rasulullah s.a.w. (hadits palsu) berkata, “Antaranya ialah hadits-hadits yang menyebutkan tarikh-tarikh akan datang.” (al-Manār al-Munīf m/s 110).

Di tempat lain pula ketika menyebutkan tanda-tanda hadits maudhu` beliau berkata, “Antaranya tersebut di dalam hadits itu tarikh sekian-sekian. Seperti sabdanya (konon), “Pada tahun sekian-sekian akan berlaku sekian-sekian.” (al-Manār al-Munīf m/s 63-64).

(18) Kalaulah memang Nabi s.a.w. telah menyebut tarikh-tarikh yang tepat seperti itu, tentulah berdasarkan sesuatu peristiwa. Daripada peristiwa manakah tarikh-tarikh itu dikira bermula? Daripada kelahiran Bagindakah? Daripada peristiwa hijrah

Bagindakah? Atau daripada tarikh kewafatan Baginda? Kenapa tidak ada seorang pun sahabat bertanya tentangnya? Kalau telah pun diketahui semua orang permulaan tahun yang dikehendaki Nabi s.a.w., sudah tentu para sahabat tidak akan sibuk lagi berbincang di zaman Saiyyidina `Umar untuk menentukan permulaan tahun dalam kalendar Islam!

**Usul (42):** Hadits-hadits yang memuji dan menyatakan kelebihan kehidupan membujang dan mencela kehidupan berkeluarga dengan beranak pinak semuanya karut. Tidak ada satu pun daripadanya sahih.

Di bawah ini dikemukakan beberapa contohnya:

**Contoh Pertama:**

(١) عن عبدالله بن مسعود قال قال رسول الله صلى الله عليه وسلم: إِذَا أَحَبَّ اللَّهُ عَبْدًا افْتَنَاهُ لِنَفْسِهِ وَلَمْ يَشْغَلْهُ بِزَوْجَةٍ وَلَا وَلَدٍ

Maksudnya: Diriwayatkan daripada Ibnu Mas`ud, katanya: Rasulullah s.a.w. bersabda: Apabila Allah kasih kepada seseorang hambaNya, Dia akan memilihnya untuk diriNya dan tidak menyibukkannya dengan isteri dan anak.

**Rujukan:**

Lihat Ibnu al-Jauzi - al-Maudhū`āt j.2 m/s 278, Abu Nu`aim – Ḥilyatul Auliya` j.1 m/s 25, as-Suyūthi – al-La`āli` al-Mashnū`ah – j.2 m/s 180, adz-Dzahabi - Talkhīsh al-Maudhū`āt m/s 136, Ibnu `Arrāq al-Kināni - Tanzīh as-Syarī`ah al-Marfū`ah j.2 m/s 210, Muḥammad Thāhir al-Fattani al-Hindi - Tadzkiratu al-Maudhū`āt m/s 194, al-Albāni – Silsilatu al-Aḥādīth ad-Dha`īfah Wa al-Maudhū`ah j.7 m/s 270.

**Komentar:**

(1) Ḥadīth ini boleh dikatakan terdapat di dalam hampir semua kitab-kitab yang mengumpulkan hadits-hadits maudhu`. Menunjukkan ia disepakati sebagai hadis maudhu`.

(2) Abu Nu`aim telah mengemukakannya dengan sanad seperti berikut:

حَدَّثَنَا أَبُو غَانِمٍ سَهْلُ بْنُ إِسْمَاعِيلَ الْفَقِيهَ الْوَاسِطِيُّ، ثَنَا عَبْدُ اللَّهِ بْنُ الْحَسَنِ، ثَنَا إِسْحَاقُ بْنُ وَهْبٍ، ثَنَا عَبْدُ الْمَلِكِ بْنُ يَزِيدَ، ثَنَا أَبُو عَوَانَةَ، عَنْ الْأَعْمَشِ، عَنْ أَبِي وَائِلٍ، عَنْ عَبْدِ اللَّهِ بْنِ مَسْعُودٍ، قَالَ:

Jika dilihat kepada sanad ini, maka ia tidak lebih daripada satu *hadits mauquf*, ia terhenti pada Ibnu Mas'ud. Mungkin tergugur daripada penyalin atau pencetak pengangkatan sanad hadits ini sampai kepada Nabi s.a.w.

Justeru sebenarnya ia dikaitkan dengan Rasulullah s.a.w. seperti dapat anda lihat pada sanad yang dikemukakan oleh Ibnu al-Jauzi. Lihat sanadnya di bawah ini:

باب التعزب أنبأنا محمد بن عبد الباقي بن أحمد أنبأنا حمد بن أحمد حدثنا أبو نعيم الحافظ حدثنا أبو غانم سهل بن إسماعيل الفقيه حدثنا عبد الله بن الحسن حدثنا إسحاق ابن وهب العلاف حدثنا عبد الملك بن يزيد حدثنا أبو عوانة عن الأعمش عن أبي وائل عن عبد الله بن مسعود قال قال رسول الله صلى الله عليه وسلم: إذا أحب الله عبدا اقتناه لنفسه ولم يشغله بزوجة ولا ولد.

(3) Ibnu al-Jauzi setelah mengemukakan hadits di atas bersama sanadnya meletakkan kesalahan di atas pundak Ishaq bin Wahab. Setelah berkata ia hadits *maudhu'*, beliau berkata, “Ishaq bin Wahab pendusta besar, seorang perawi *matruk* yang banyak meriwayatkan kekarutan.”

(4) Adz-Dzahabi pula meletakkan kesalahannya di atas pundak `Abdul Malik bin Yazid. Kata beliau di dalam *Talkhīsh al-Maudhū'āt* m/s 136, “Saya tidak tahu siapa `Abdul Malik. Mungkin dialah perekanya.”

(5) Selain terdapat di dalam sanadnya perawi-perawi hadits *maudhu'*, kandungan hadits itu sendiri memang bercanggah dengan sekian banyak ayat-ayat al-Qur'ān dan hadits-hadits Rasulullah s.a.w. dan Sunnahnya.

(6) Seolah-olahnya Allah tidak kasih, tidak sayang dan tidak begitu suka kepada orang-orang yang berkeluarga dan beranak pinak. Padahal bagaimana Allah tidak kasih kepada orang-orang yang mensyukuri ni'matnya dengan hidup berkeluarga yang disebut Allah di dalam al-Qur'ān sebagai kurniaanNya?

Allah berfirman:

وَاللَّهُ جَعَلَ لَكُم مِّنْ أَنْفُسِكُمْ أَزْوَاجًا وَجَعَلَ لَكُم مِّنْ أَزْوَاجِكُمْ بَيْنَ وَحَفْدَةٍ وَرَزَقَكُم مِّنَ الطَّيِّبَاتِ أَفَبِالْبَاطِلِ  
يُؤْمِنُونَ وَيَنْعَمَتِ اللَّهُ هُمْ يَكْفُرُونَ ﴿٣٧﴾

Bermaksud: Dan Allah menjadikan bagi kamu dari jenis kamu sendiri pasangan-pasangan (isteri), dan dijadikan bagi kamu dari pasangan kamu anak-anak dan cucu-cicit, serta dikurniakan kepadamu dari benda yang baik lagi halal; maka patutkah mereka (yang ingkar itu) percaya kepada perkara yang salah (penyembahan berhala dan lain-lain), dan mereka kufur pula akan ni`mat Allah? (an-Nahl:72).

### Contoh Kedua:

(٢) عَنْ أَنَسٍ رَفَعَهُ: يَأْتِي عَلَى النَّاسِ زَمَانٌ لَّأَنْ يُرَبِّيَ أَحَدُكُمْ جَرَوْ كَلْبٍ خَيْرٌ لَهُ مِنْ أَنْ يُرَبِّيَ وَلَدًا مِنْ صُلْبِهِ

Maksudnya: Diriwayatkan daripada Anas daripada Nabi s.a.w.: “Akan datang kepada manusia suatu zaman di mana ia memelihara anak anjing lebih baik lagi baginya daripada memelihara anak kandungnya.”

### Rujukan:

Al-Ĥākim – Akhbār Asfahān j.5 m/s 11, al-Ĥākim - al-Mustadrak `Ala as-Shahīhain j.3 m/s 386, ad-Dailami – Musnadu al-Firdaus j.4 m/s 317, Ibnu al-Jauzi – al-Maudhū`āt j.2 m/s 279, as-Suyuthi - La`ālī`u al-Mashnu`ah j.2 m/s 151, ar-Raudhu al-Bassām j.5 m/s 132-134, Asy-Syaukāni – al-Fawā`id al-Majmū`ah m/s 134.

### Komentari:

(1) Hadits di atas diriwayatkan daripada Anas. Selain daripada Anas ia juga dengan lafaz yang sedikit berbeza telah diriwayatkan secara dusta atas nama Nabi s.a.w. daripada beberapa orang sahabat Baginda. Mereka yang dilibatkan ialah Ĥudzaifah, Abu Dzar dan Ibnu `Abbaas.

(2) Di dalam sanad hadits yang dida`wa telah diriwayatkan oleh Anas itu terdapat perawi yang meriwayatkannya daripada Anas. Namanya Daud bin `Affān. Kata Ibnu Ĥibbān tentang Daud, “Dia berkeliaran di Khurasan. Dia telah mengada-ngadakan hadits atas nama Anas.” Kata Abu Nu`aim, “Daud meriwayatkan satu nuskah kitab

mengandung hadits-hadits maudhu' daripada Anas." Demikian juga kata al-Ĥākim dan an-Naqqāsh. (Lihat Lisān al-Mīzān j.2 m/s 421).

(3) Di dalam sanad-sanad hadits berkenaan yang diriwayatkan daripada sahabat-sahabat lain juga terdapat perawi-perawi yang sangat bermasalah. Di dalam sanad al-Ĥākim yang diriwayatkan daripada Abi Dzar sebagai contohnya terdapat Saif bin Miskīn al-Uswāri, seorang perawi dha'if. Dia meriwayatkannya daripada al-Mubārak bin Fadhālah. Al-Mubārak bin Fadhālah meriwayatkannya daripada Muntshir bin 'Umārah bin Abi Dzar daripada ayahnya daripada datuknya.

Al-Mubārak meriwayatkannya secara 'an'anah, sedangkan dia seorang *mudallis*. Di situ terdapat kelemahan. Muntshir dan ayahnya pula, kedua-duanya perawi *majhūl*. Sekali lagi membuatkan hadits itu dha'if.

Menurut ilmu hadits, sesuatu hadits akan dikira sebagai sangat dha'if (ضعيف جدا) apabila ada padanya beberapa orang perawi yang lemah atau ada padanya beberapa sebab yang mendha'ifkannya.

Al-Ĥākim yang meriwayatkannya sendiri mengakui bahawa hanya Saif meriwayatkannya. Ertinya Saif bersendirian (tafarrud) dalam meriwayatkannya, sedangkan dia seorang yang dha'if.

Abu Dzar seorang sahabat yang sangat terkenal, kenapa anak dan cucunya yang majhūl sahaja meriwayatkan hadits itu daripadanya. Dan kenapa pula orang yang dha'if seperti Saif itu sahaja yang meriwayatkannya daripada cucu Abu Dzar yang majhūl itu?

(4) Bagaimana di dalam hadits itu dikatakan Nabi s.a.w. bersabda, "Ia memelihara anak anjing lebih baik lagi baginya daripada memelihara anak kandungnya", bukankah sabda Baginda itu boleh mendorong umatnya memelihara anak anjing dan seterusnya bapa atau ibu anjing? Sedangkan Baginda sendiri tidak suka anjing dipelihara tanpa sebab-sebab yang mengharuskan.

(5) Bagaimana Rasulullah s.a.w. boleh berkata begitu, sedangkan terdapat hadits 'Aaishah yang menyatakan bahawa pernah Jibril a.s. berjanji untuk datang bertemu dengan Rasulullah s.a.w. pada suatu masa tertentu. Tiba-tibanya Baginda terasa

kedatangannya lambat. Setelah membuka pintu untuk keluar, Baginda mendapati Jibril a.s. rupa-rupanya sedang berdiri di luar pintu rumah. Maka Nabi s.a.w. bertanya Jibril a.s.: “Apa yang menghalangmu masuk?” Jawab Jibril: إِنَّ فِي الْبَيْتِ كَلْبًا، وَإِنَّا لَا نَدْخُلُ. Bermaksud: Kerana di dalam rumahmu ada anjing. Sesungguhnya kami tidak masuk ke dalam rumah yang di dalamnya ada anjing dan patung.”

(6) Bukankah di dalam sekian banyak hadits tersebut bahawa memelihara anjing tanpa tujuan yang dibenarkan Syari`at mengurangkan pahala sebanyak satu qirath atau dua qirath - mengikut sesetengah riwayat - setiap hari? Lihat sebagai contoh hadits berikut:

مَنْ اتَّخَذَ كَلْبًا إِلَّا كَلْبَ صَيْدٍ أَوْ مَاشِيَةٍ نَقَصَ مِنْ عَمَلِهِ كُلَّ يَوْمٍ قِيرَاطَيْنِ

Bermaksud: Sesiapa memelihara anjing - kecuali anjing perburuan atau anjing (untuk mengawal) ternakan - berkuranglah (pahala) amalannya setiap hari sebanyak dua qirath. (Hadits riwayat Bukhāri, Muslim, Malik, Aḥmad, Ibnu Abi Syaibah, Tirmidzi, Nasā’i dan lain-lain).

Kalau begitu kenapa pula Nabi s.a.w. bersabda, “Ia memelihara anak anjing lebih baik lagi baginya daripada memelihara anak kandungnya”. Adakah dengan memelihara anak kandung, manusia akan kekurangan pahala amalan kebaikan setiap hari sebanyak tiga qirath atau empat qirath?!

(7) Memelihara anak sendiri atau anak yatim adalah salah satu amalan yang sangat mulia pada pandangan agama Islam. Ia termasuk salah satu amalan kebaikan yang menjamin seseorang ke syurga. Memelihara anak-anak khususnya anak-anak perempuan pula boleh menghindarkan seseorang daripada neraka, tiba-tiba di dalam apa yang dikatakan hadits itu tersebut “memelihara anak anjing lebih baik baginya daripada memelihara anak kandungnya”!

Lihat sebagai buktinya hadits-hadits di bawah ini:

1- Anas bin Malik meriwayatkan, katanya, Rasulullah s.a.w. bersabda:

مَنْ عَالَ جَارِيَتَيْنِ حَتَّى تَبْلُغَا جَاءَ يَوْمَ الْقِيَامَةِ أَنَا وَهُوَ هَكَذَا وَصَمَّ أَصَابِعُهُ

Bermaksud: Sesiapa menanggung dua orang anak perempuan sehingga mereka baligh, dia datang pada hari kiamat dalam keadaan aku dan dia begini – sambil Baginda merapatkan jari-jarinya. (Hadits riwayat Muslim).

2- Nabi s.a.w. bersabda:

مَنْ كَانَ لَهُ ثَلَاثُ بَنَاتٍ، فَصَبَرَ عَلَيْهِنَّ وَأَطْعَمَهُنَّ وَسَقَاهُنَّ وَكَسَاهُنَّ مِنْ جِدَّتِهِ، كُنَّ لَهُ حِجَابًا يَوْمَ الْقِيَامَةِ مِنَ النَّارِ

Bermaksud: Sesiapa mempunyai tiga orang anak perempuan, dia sabar menjaganya, dia memberi makan, minum dan pakaian kepadanya dengan duitnya (sendiri), niscaya mereka menjadi pendinding baginya pada hari kiamat nanti daripada neraka. (Hadits riwayat Bukhāri di dalam al-Adabu al-Mufrad, Aḥmad, Ibnu Majah, Abu Ya'la, at-Thabarāni di dalam al-Mu'jam al-Kabīr dan Baihaqi di dalam Syu'ab al-Imān).

3- Sahal bin Sa'ad meriwayatkan, katanya, Nabi s.a.w. juga bersabda:

أَنَا وَكَافِلُ الْيَتِيمِ فِي الْجَنَّةِ هَكَذَا وَأَشَارَ بِالسَّبَابَةِ وَالْوُسْطَى

Bermaksud: “Aku dan penjaga anak yatim di dalam syurga begini.” (Kata Sa'ad) sambil Baginda mengisyaratkan dengan jari telunjuk dan jari tengahnya. (Hadits riwayat Bukhāri, Aḥmad, Abu Daud, Tirmidzi dan Ibnu Ḥibbān).

### Contoh Ketiga:

(٣) عن عائشة قالت: قال رسول الله صلى الله عليه وسلم: ما أفلح صاحب عيال قط

Maksudnya: Diriwayatkan daripada 'Aaishah, katanya, Rasulullah s.a.w. bersabda: “Tidak pernah berjaya sama sekali orang yang berkeluarga (yang mempunyai anak pinak).”

### Rujukan:

Ibnu 'Adi – al-Kāmil j.1 m/s 193, Ibnu al-Jauzi – al-Maudhu'āt j.2 m/s 281, as-Suyuthi - al-La'ālī' al-Mashnū'ah j.2 m/s 153, As-Sakhāwi - al-Maqāshidu al-Ḥasanah m/s 572, Al-'Ajalūni - Kasyfu al-Khafā' j.2 m/s 210, Ibnu 'Arrāq al-Kināni - Tanzīhu asy-Syarī'ah al-Marfū'ah j.2 m/s 201, al-Albāni – as-Silsilatu ad-Dha'īfah j.3 m/s 563.

## Komentar:

(1) Hadits `Aaishah itu dikemukakan oleh Ibnu al-Jauzi pada صاحب العيال dengan rangkaian sanad yang panjang seperti di bawah ini:

أَبْنَاءُ ابْنِ السَّمْرِقَنْدِيِّ أَنْبَاءُ إِسْمَاعِيلَ بْنِ مَسْعُودَةَ أَنْبَاءُ حَمْزَةَ بْنِ يُونُسَ السَّهْمِيِّ أَنْبَاءُ أَبِي عَبْدِ اللَّهِ مُحَمَّدَ بْنَ إِبْرَاهِيمَ الشَّرَاطِيِّ حَدَّثَنَا عَدِيُّ بْنُ عَبْدِ اللَّهِ بْنِ عَدِيٍّ حَدَّثَنَا أَبُو الْحَسَنِ عَلِيُّ بْنُ أَحْمَدَ بْنِ سَيْفٍ حَدَّثَنَا أَحْمَدُ بْنُ حَفْصٍ بْنُ عَمْرِو السَّعْدِيِّ حَدَّثَنَا أَحْمَدُ بْنُ سَلَمَةَ الْكِسَائِيُّ حَدَّثَنَا سَفْيَانُ عَنْ هِشَامَ بْنِ عُرْوَةَ عَنْ أَبِيهِ عَنْ عَائِشَةَ قَالَتْ: قَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ: " مَا أَفْلَحَ صَاحِبُ عِيَالٍ قَطُّ "

(2) Setelah mengemukakannya Ibnu al-Jauzi berkata:

هذا حديث باطل عن رسول الله صلى الله عليه وسلم ما قاله قط، وأقواله على ضد هذا، وإنما يروى نحو هذا عن سفیان.

Bermaksud: “Ini adalah satu hadits yang karut (diriwayatkan) daripada Rasulullah s.a.w. Tidak pernah Baginda bersabda begitu sama sekali. Sabda-sabda Nabi s.a.w. sebaliknya bercanggah dengannya. Hadits seumpama ini hanya diriwayatkan daripada Sufyan.”

Kemudian beliau berkata, “Di dalam isnadnya ada Aḥmad bin Salamah.” Ibnu `Adi berkata, “Dia meriwayatkan banyak perkara-perkara karut daripada *perawi-perawi tsiqāt*. Di dalamnya juga ada Aḥmad bin Ḥafsh. Dia meriwayatkan banyak hadits mungkar yang langsung tidak diriwayatkan oleh orang-orang lain.”

(3) Apa yang disebutkan oleh Ibnu al-Jauzi itu diperakui as-Suyuthi di dalam al-La’ālī’ al-Mashnū’ah, Ibnu `Arrāq di dalam Tanzih asy-Syari`ah al-Marfū’ah dan orang-orang lain yang menulis buku-buku tentang hadits-hadits maudhu’.

(4) Menerusi saluran riwayat Ibnu `Adi, hadits itu diriwayatkan juga oleh ad-Dailami di dalam Musnad al-Firdaus, daripada Ayyub bin Nūḥ al-Mutthawwi’i, katanya, ayahku meriwayatkan kepadaku, katanya, Muḥammad bin Muḥammad bin `Ajlān meriwayatkan kepadaku daripada Sa`id daripada Abi Hurairah secara marfū’.

Riwayat inilah yang disebut oleh as-Suyuthi di dalam “Dzail al-Aḥādīṡ al-Maudhū’ah” pada muka surat 175-176. Setelah menyebutnya as-Suyuthi menukulkan kata-kata Ibnu `Adi bahawa hadits itu mungkar.



(5) Bagaimana boleh diterima Rasulullah s.a.w. telah bersabda: “Tidak pernah berjaya sama sekali orang yang berkeluarga (yang mempunyai anak pinak).” Sedangkan di dalam hadits-hadits sahih Baginda bersabda sebaliknya, seperti kata Ibnu al-Jauzi. Lihat antaranya hadits berikut:

أَفْضَلُ دِينَارٍ يُنْفَقُهُ الرَّجُلُ دِينَارٌ يُنْفَقُهُ عَلَى عِيَالِهِ، وَدِينَارٌ يُنْفَقُهُ عَلَى فَرَسٍ فِي سَبِيلِ اللَّهِ، وَدِينَارٌ يُنْفَقُهُ الرَّجُلُ عَلَى أَصْحَابِهِ فِي سَبِيلِ اللَّهِ

Bermaksud: Sebaik-baik duit yang dibelanjakan oleh seseorang itu ialah (1) duit yang dibelanjakannya untuk menanggung ahli keluarganya (anak pinaknya), (2) duit yang dibelanjakan untuk kuda di jalan Allah, dan (3) duit yang dibelanjakannya untuk sahabat-sahabatnya yang berjuang di jalan Allah. (Hadits riwayat Muslim, Tirmidzi, Ibnu Majah, Ahmad dan Bukhari di dalam al-Adabu al-Mufrad).

Soalnya adakah orang yang mendapat sebaik-baik kelebihan seperti disebut oleh Rasulullah s.a.w. itu tidak mendapat kejayaan? Adakah orang yang mendapatnya tidak beruntung?

Sebaik-baik duit yang dibelanjakan oleh seseorang mula-mula sekali disebut oleh Rasulullah s.a.w. di dalam hadits di atas, duit yang dibelanjakannya untuk menanggung ahli keluarganya (anak pinaknya).

Rasulullah s.a.w. juga bersabda:

دِينَارٌ أَنْفَقْتَهُ فِي سَبِيلِ اللَّهِ وَدِينَارٌ أَنْفَقْتَهُ فِي رَقَبَةٍ وَدِينَارٌ تَصَدَّقْتَ بِهِ عَلَى مِسْكِينٍ وَدِينَارٌ أَنْفَقْتَهُ عَلَى أَهْلِكَ أَعْظَمُهَا أَجْرًا الَّذِي أَنْفَقْتَهُ عَلَى أَهْلِكَ

Bermaksud: Satu dinar yang engkau belanjakan di jalan Allah, satu dinar yang engkau belanjakan untuk memerdekakan hamba, satu dinar yang engkau belanjakan kepada orang miskin, dan satu dinar yang engkau belanjakan kepada ahli keluargamu. Yang paling besar pahalanya ialah yang engkau belanjakan kepada ahli keluargamu. (Hadits riwayat Muslim dan Ahmad).

Lihat betapa besarnya pahala membelanjakan sesuatu kepada anak isteri. Rasulullah s.a.w. sendiri menyebutkan yang paling besar pahalanya ialah yang engkau belanjakan kepada anak isterimu. Pahalanya lebih besar lagi daripada pahala

membelanjakan duit di jalan Allah, memerdekakan hamba atau membelanjakannya kepada orang miskin.

Adakah orang yang mendapat pahala sebegitu besar tidak berjaya dan tidak beruntung? Bagaimana seseorang akan dapat membelanjakan sesuatu kepada anak isterinya kalau dia tidak berkeluarga?!

(6) Kelebihan-kelebihan yang tersebut sebelum ini hanya berupa pahala yang akan dapat dikecapi seseorang selepas mati, semasa hidup di dunia lagi berapa ramai manusia beruntung, berjaya dan berbangga dengan kejayaan anak-anaknya. Berapa ramai manusia, paling tidak berasa sangat berjaya dan beruntung di hari-hari tuanya apabila melihat kejayaan anak cucunya!

Kalau begitu tidak benar sama sekali apa yang dibentangkan pada contoh ketiga itu sebagai sabda Rasulullah s.a.w. Firman Allah atau sabda Rasul tidak pernah bercanggah dan bertentangan di antara satu sama lain.

(7) Sukar diterima dan difahami kenyataan itu, (Tidak pernah berjaya sama sekali orang yang berkeluarga atau yang mempunyai anak pinak), apa maksud sebenarnya? Kejayaan dinafikan secara total, dinafikan sama sekali daripada orang yang berkeluarga atau beranak pinak.

Jika diandaikan kejayaan yang dinafikan itu ialah kejayaan dunia, jelas sekali tidak benarnya. Alangkah ramai orang yang berkeluarga dan beranak pinak berjaya di dunia ini!

Atau apa yang dinafikan itu ialah kejayaan dalam kehidupan berumah tangga, juga tidak benar. Alangkah banyaknya rumah tangga yang berjaya dan bahagia di dunia ini.

Kenyataan seperti itu hanya sesuai keluar dari mulut orang yang kecewa dan putus asa dalam kehidupan berumah tangganya. Ia sama sekali tidak sesuai bahkan mustahil keluar dari mulut seorang nabi.

(8) Jika diandaikan apa yang dida'wa sebagai sabda Nabi s.a.w. itu: "ما أفلح صاحبُ عيال" sebenarnya adalah doa (keburukan) kepada orang yang berkeluarga dan beranak pinak, lantaran ia berupa جملة خبرية لفظا وإنشائية معنى sekalipun, tetap juga ia tidak benar.

Kerana menganggap cerita itu sebagai doa keburukan bercanggah pula dengan sekian banyak hadith-hadith Rasulullah s.a.w.

Bukankah Rasulullah s.a.w. selalu mendoakan keberkatan dan kebaikan untuk sahabat-sahabatnya yang baru berkahwin? Bukankah Rasulullah s.a.w. juga selalu mendoakan keberkatan dan kebaikan untuk kehidupan keluarga sahabat-sahabat tertentu hingga ke anak cucunya?

Abu Hurairah meriwayatkan bahawa Rasulullah s.a.w. apabila memberi ucapan tahniah atas perkahwinan seseorang, akan mendoakan kebahagiaan untuknya di samping mendoakan juga semoga ia dikurniakan zuriat yang baik, dengan berkata:

بَارَكَ اللَّهُ لَكَ، وَبَارَكَ عَلَيْكَ، وَجَمَعَ بَيْنَكُمَا فِي خَيْرٍ

Bermaksud: Semoga Allah memberkatimu. Semoga Dia memberkati kehidupanmu. Dan semoga Dia mengumpulkan kamu berdua (suami isteri) dalam kebaikan. (Hadith riwayat Abu Daud dan Tirmidzi).

Apabila mendapati `Abdur Rahman bin `Auf sebagai pengantin baharu, bukankah Rasulullah s.a.w. berkata sebagai doa Baginda untuknya: فَبَارَكَ اللَّهُ لَكَ (semoga Allah memberkatimu)? (Lihat Sahih Bukhari dan Sahih Muslim).

Antara doa khusus Rasulullah s.a.w. untuk sahabatnya Anas bin Malik pula ialah:

اللَّهُمَّ أَكْثِرْ مَالَهُ وَوَلَدَهُ وَبَارِكْ لَهُ فِيمَا أُعْطِيَتهُ

Bermaksud: Ya Allah, perbanyakkanlah hartanya dan anak-anaknya dan berkatilah untuknya pada apa yang Engkau berikan kepadanya. (Hadith riwayat Bukhari dan Muslim).

Seorang Nabi lagi Rasul yang selalu mendoakan keberkatan, kebaikan dan kejayaan untuk orang-orang yang berkeluarga, mustahil akan mendoakan keburukan dan kegagalan pula untuk mereka!

(9) Salah seorang peserta kuliah saya menimbulkan persoalan bahawa tidak adakah kemungkinan hadith contoh ke-3 itu (ما أفلح صاحب عيال قط) memberi erti positif apabila kita memakai ما di permulaannya sebagai ما ta'jjubiyah? Tidakkah kalau ما itu

dipakai sebagai ما ta'jjubiyyah, ia akan memberi erti “Alangkah berjayanya / beruntungnya orang yang mempunyai keluarga”?

Kalau begitu bererti Nabi s.a.w. memuji orang yang ada keluarga dan menanggung keluarganya. Tidak akan ada lagi erti yang negatif seperti diperkatakan pada beberapa poin di atas.

Sebagai menjawabnya saya berkata, tidak ada kemungkinan itu kerana beberapa sebab seperti berikut:

(a) Perkataan ما di permulaannya itu sama sekali tidak boleh dipakai sebagai ما ta'jjubiyyah, ia bahkan ما nāfiyah (ما yang memberi erti tidak). Alasannya ialah fi'il (ta'ajjub) selepas ما ta'jjubiyyah, menashabkan isim selepasnya, bukan memarfukannya. Ternyata isim yang terletak selepas أفلح itu marfu' (dengan berbaris dhammah) sebagai fā'ilnya, bukan manshub (dengan berbaris di atas) sebagai maf'ul bagi fi'il ta'ajjub.

(b) Demikianlah ia terdapat di dalam kitab-kitab hadits maudhu' yang memuatkannya dan juga kitab asal di mana ditemui hadits tersebut.

(c) Semua pengarang kitab-kitab hadits maudhu' memasukkannya di bawah bab celaan terhadap orang-orang yang berkeluarga, bukan di bawah bab pujian terhadap mereka.

(d) Andaikan saja kalau masih ada orang yang hendak menegakkan benang basah dengan menuduh dan mengatakan pengarang-pengarang kemudian sahaja yang memberi baris dhammah kepada isim selepas perkataan أفلح dan mengi'rāb isim itu sebagai fā'ilnya. Sedangkan boleh pun ما di permulaannya dipakai sebagai ما ta'jjubiyyah (ما yang memberi erti alangkah).

Maka penulis akan berkata, tidak boleh sama sekali ما di permulaannya dipakai sebagai ما ta'jjubiyyah, kerana perkataan قط (sama sekali) yang tersebut di akhir hadits itu adalah penentunya. Perkataan قط hanya boleh terdapat selepas ما نافية, bukan ما تعجبية. Ma'na ayat akan menjadi rosak dan ia tidak akan memberi apa-apa ma'na yang berfaedah jika ما di situ dipakai sebagai ما ta'jjubiyyah.

Bolehkah anda faham jika ada orang berkata kepada anda: “Alangkah berjayanya orang yang menanggung keluarga sama sekali”?

Adanya perkataan “sama sekali” di akhir ayat itu tentu sekali akan memeningkan anda.

Berbeza keadaannya kalau orang berkata begini kepada anda: “Tidak pernah sama sekali berjaya orang yang menanggung keluarganya”.

Ayat seperti ini tentunya dapat difahami anda dengan mudah, walaupun apa yang terkandung di dalamnya tidak benar!